



## **GIZARTE ZERBITZUETAKO DEPARTAMENTUA ERREFORZATZEKO NEURRIAK EZARTZEAREN ALDE**

Bertan artatu behar diren egoera eta problematiken garrantasuna kontutan hartuz, eta are gehiago bizi garen eta biziko garen garaiotan, ez da gehiegiria esatea Gizarte Zerbitzuetako Departamentua Udalak herritarrekiko mantendu behar duen jardueraren giltzarria dela. Departamentu horren jarduerak gizarteko sektore ahul eta babesgabetuekiko sentsibilitadearen neurgailua da, aplikatzen den politika sozialaren adierazgarri.

Mozio honen bidez, EH Bildutik Udal Gobernuaren pasibotasuna agerian utzi nahi dugu, Gizarte Zerbitzuen arloari dagokionez. Ekintza falta honen ondorioz kolapso egoerara iristen ari da Departamentua, orain arte Lasarte-Orian ezagutu ez den neurriraino iritsi ere, horrek herritarren eskubideen kaltetan dakartzan ondorio guztiekin.

Honen adibidea, besteak beste, 65 urte baino gehiagoko pertsonen kolektiboan aurki daiteke. Kolektibo honetan zentratzen da Departamentuaren lan kargaren zati handienetako; adinak aurrera egin ahala, osasun arazoak sortzean pertsonen autonomia galdu eta pixkanaka-pixkanaka dependienteagoak egiten dira. Horrek egunerokoari aurre egin ahal izateko laguntza behar dutela suposatzen du. Ñabardurak ñabardura, antzeko arazoak planteatzen dira beste kolektibo batzuen kasuetan ere.

Problematika hauen ezaugarriak direla, Gizarte Zerbitzuen Legeak beranduen astebeteko epean artatu behar direla agintzen du. Bada, gaur da eguna non eskatu eta bi hilabetetara ematen dela lehenengo hitzordua.

Udalak herritarren eskaerei arreta emateko eskandaluzko atzerapen honek dakarren ondorioetako bat da, lehen aipatu dugun kolektiboaren kasuan, familiak hartu behar duela bere gain adineko dependientearen zaintzaren karga, kanpoko laguntzarik gabe. Duela gutxi ezagutu dugu iktus batek jo eta gero ospitaletik jaitsi den pertsona baten kasua, zeina Gizarte Zerbitzuek ezin izan diote bere eskakizunari erantzun legeak markatzen dituen epeen barruan.

Gizarte Larrialdietarako Laguntzena izan daiteke beste adibidea. Ekainaren hasieran erabaki gabe zeuden oraindik, horrek suposatzen duen guztiarekin: egoera larrietan lagungarriak izateko helburua ez dute betetzen; eta suertatutako arazo ekonomikoari aurre egiteko ez dute balio, argindar edo gas mozketak, edota oinarrizko elektrotresnen matxuren konponketen kasu.

Babesgabetasun arriskupean dauden adingabekoen kasuak, aldiz, nahiz eta pertsonen adinekoren bezain ugaria ez izan kopuruz, sentikortasun handiko kasuak dira hauek ere. Bada, zerbitzu hau Udalarentzat kudeatzen duen Hezizerb enpresak aurkeztutako 2017ko memoriaren bidez jakin ahal izan dugunez, duela urtebete geroztik, gutxienez, zerbitzua kolapsatuta dago. Ez dago plaza berririk babesik gabe egon daitezkeen adingabekoentzat; hau da, zortearen menpe geratzen dira. Arlo honetan ere, Udal gobernutik ez da ezer egin irtenbideak bilatzeko.

Familiak pairatzen dituzten tentsio eta arazoen karga hauen guztien ondorioak udal langileek pairatzen dute eta hainbat kasu gertatu dira non egoera larrian dauden herritarrek udal langileen kontra eskatzen dute beraien ezinegona eta inpotentzia: ahozko biolentzia egoerak gertatu dira eta baita mehatxuak ere kasuren batean. Udal langileek herritarrak lasaitu ezinda, Udaltzainak joan behar izan dira behin baino gehiagotan langileak babestera.

Bai maila pertsonalean bai Langileen Batzordearen bidez Villa Mirentxuko langile batzuk salatu dutenez, egoera honek antsietateak, fobiak eta beldurrak sortu dituzte langileen artean. 2017an 7 langiletik 5 baja eman dira, eta botikak hartu beharra daukate lo egin eta lanera joateko.

Arazo hauek guztiak ikusita, salatutako gertaera hauek mozio honen bidez publiko egin eta egoerari aurre egiteko eta neurriak hartzeko eskaera luzatu nahi diogu Udal Gobernuari. Ezin dugu ahaztu Atsopakar Aldundira eskualdatzean egindako promesa, bete gabe geratu den promesa, Gizarte Zerbitzuetako inbertsioak handituko zituztela.

Aurreko guztiak kontutan hartuta, EH Bildu Udal Taldeak ondoko proposamena aurkezten du Udalbatzarrean onartua izateko:

1.- Biztanleriaren zahartzeak eta egoera ekonomikoak sortutako premiak gero eta handiagoak izango direla jabetuta, Gizarte Zerbitzuetako pertsonala erreforatzeko beharra baloratuko duen eztabaida mahai bat eratzea. Mahai hau udaletxeko pertsonal tekniko eta administratibo, talde politiko eta kanpoko adituez osatuta egongo da.

2.- Interbentzio sozoedukatiboaren zerbitzua zabaltzea eta indartzea, babesgabetasun arriskupeko adingabeak dituzten familien beharrei erantzun ahal izateko.

Lasarte-Orian, 2018ko ekainaren 6an